

Tika nkombo ya Nkolo na biso Yesu Klisto epambolama sik'oyo mpe seko na seko. Boyei malamu; tika tózwa ntango moke mpo na koyekola maloba ya bomoi. Lelo, tokotala ndimbola ya kobengama mpe ndenge ekoki kokesana epai ya moto na moto kolanda plan ya Nzambe oyo ekeseni mpo na moto nyonso.

Tobanda na kotánga mikapo oyo:

Matayo 11:18-19 (Mokanda na Bomoi)

“Yoane ayaki, azalaki kolya te mpe komela te; balobaki: ‘Azali na molimo mabe.’

Mwana ya Moto ayaki azali kolya mpe komela; balobi: ‘Talá ye! moto ya lokoso mpe moto ya masanga, moninga ya bakangisi mpako mpe ya basumuki!’ Kasi bwanya emonanelaka polele na misala na yango.”

Liteya ya Nzambe:

Yesu azali kokokanisa Ye moko na Yoane Mobatisi. Bazalaki bango

mibale na kobengama oyo ewutaki na Nzambe, kasi lolenge ya bomoi na bango ezalaki ndenge moko te. Yoane azalaki kokabwana na mokili, na bomoi ya komikanga makasi, lokola elembo ya bobongoli motema (Matayo 3:4). Kasi Yesu, Ye, azalaki kosangana na bato, kolya mpe komela elongo na bango, kolakisa ete mosala na Ye ezalaki ya kobenga basumuki na bobongoli motema na nzela ya bolingo mpe boyokani. Bomoi nyonso mibale ezalaki kati na plan ya lobiko ya Nzambe, kasi kobengama ya moto na moto ezalaki na mokano na yango.

Toyebi ete kobengama ya Yoane Mobatisi ezalaki ya kobongisa nzela ya Nkolo (Luka 3:4). Azalaki kovanda na esobe, mosika na bisengo ya mokili, mpo na kolakisa ete bobongoli motema esengeli. Yesu, atako azalaki Nzambe mobimba, ayaki kovanda kati na bato, kosangana na bomoi ya bato, ata kolya elongo na basumuki. Yango elingi koloba te ete Yesu andimaki lisumu, kasi ayaki kobikisa, kasi te kosambisa (Luka 5:31-32).

Luka 7:24-25 (Mokanda na Bomoi)

“Ntango batindami ya Yoane bakendaki, Yesu abandaki koloba na bato na tina na

: ‘Bokendaki kotala nini na esobe? Mposho oyo mopepe ezali koningisa?

To bokendaki kotala nini? Moto oyo alati bilamba ya pete?

Talá, bato oyo balataka bilamba ya kitoko mpe bazali kovanda na bomoi ya bofuluki bazalaka na bandako ya bakonzi.’”

Liteya ya Nzambe:

Yesu azali kolakisa bosolo ya bomoi ya pete ya Yoane. Azali kotuna bato bákanisa nini ezali na ntina mingi epai ya mosakoli ya Nzambe. Yoane atikalaki sembo na kobengama na ye, atungisamaki te na bozwi to nguya. Na yango, Yesu azali koteya ete monene ya solo na Bokonzi ya Nzambe ezali te na komonana ya libanda, kasi na kosala mokano ya Nzambe (Matayo 5:3-12).

Bomoi ya Yesu kati na bato elakisi biso ete kobengama na biso esengeli te ete tókima mokili, kasi ete tósala kati na mokili mpo na Bokonzi ya Nzambe. Ndenge Yesu alobaki, tozali “kati na

mokili, kasi tozali ya mokili te” (Yoane 17:14–16).

Bomoi ya komikanga ya Yoane vs. boyokani ya Yesu na basumuki

Yoane azalaki na bomoi ya komikabola na bato, akendeki kofanda na esobe mpo na kobongisa bato mpo na koya ya Klisto (Marko 1:6). Kasi mosala ya Yesu ezalaki ya kosangana na bato, kolakisa ete Bokonzi ya Nzambe ezali ya kobikisa, kasi te ya koboya. Bango nyonso mibale bazalaki kosala mokano ya Nzambe, kasi na banzela ekeseni.

1 Bakorinto 7:20–22 (Mokanda na Bomoi)

“Moto na moto etikala na ezalela oyo Nzambe abengaki ye. Obengamaki ntango ozalaki moombo? Mitungisa te; kasi soki okoki kozwa bonsomi, salela yango malamumu. Pamba te moombo oyo abengami na Nkolo azali moto ya bonsomi ya Nkolo; mpe moto oyo azalaki moto ya bonsomi ntango abengamaki, azali moombo ya Klisto.”

Liteya ya Nzambe:

Polo azali koteya ete, ezalela na biso na bomoi — ezala ya bonsomi to ya komikangama — ekobongola te motuya na biso liboso ya Nzambe. Azali te kokitisa pasi ya moombo, kasi azali kolakisa ete motuya ya molimo na biso ewutaka na Klisto. Kobengama na biso ezali ya kosalela Klisto na esika nyonso oyo tozali.

Soki Nzambe abengi yo osalela Ye na esika ya pete, yango ekitisi motuya na yo te. Ozali kaka mosali ya Klisto, na kobengama ya seko (Bagalatia 3:28). Soki ozwi bonsomi, salela yango mpo na kokumisa Nzambe (1 Petro 2:16).

Ndakisa ya Nehemiya

Na buku ya Nehemiya, tomonaka moto oyo ayebaki malamu kobengama na ye kati na mosala na ye. Atako azalaki mosali ya kopesa mokonzi masanga (mosala ya motuya), motema na ye ezalaki kopasuka mpo na engumba Yerusaleme oyo ebukaki (Nehemiya 1:4). Nzambe asalelaki esika na ye mpo na kosala mbongwana monene, kobongisa ndako ya engumba. Yango eteyi

biso ete esika nyonso Nzambe atiaka biso, tokoki kozala bisaleli ya Bokonzi na Ye.

1 Bakorinto 7:27–28 (Mokanda na Bomo)

“Ozali na mwasi? Linga te kokabwana na ye. Ozali na mwasi te? Luka te mwasi.

Kasi soki obali, osali lisumu te; mpe soki elenge mwasi abali, asali lisumu te. Kasi bato ya lolenge wana bakokutana na pasi na bomoi ya nzoto, mpe nalingi kobatela bino na yango.”

Liteya ya Nzambe:

Polo azali kolakisa ete moto asengeli kosepela na ezalela na ye. Ezala obali to obalani te, nyonso ezali kobengama mpo na kosalela Nzambe. Azali te kopamela libala, kasi azali kolakisa ete makambo ya mokili ekoki komema mikakatano oyo ekoki kopanza likebi na mosala ya Bokonzi (Matayo 19:29–30).

Polo ye moko azalaki kobala te (1 Bakorinto 7:8), mpe alobi ete bato oyo bazali kobala te bakoki kozala na bonsomi mingi mpo na kosalela Nkolo. Kasi libala mpe ezali kobengama ya malamumu mpe ya lokumu (Baebre 13:4).

Matayo 19:11-12 (Mokanda na Bomoi)

“Yesu alobaki na bango: ‘Bato nyonso bakoki kondima te liloba oyo, kaka bato oyo Nzambe apesi yango.

Pamba te basusu babotamaki bakufi lokola bongo, basusu bato nde bakómisaki bango bongo, mpe basusu bamikómisaki bongo mpo na Bokonzi ya Likolo. Moto oyo akoki kondima yango, tika andima.’”

Liteya ya Nzambe:

Yesu azali kolakisa ete bato nyonso babengami te na libala. Bato oyo bakoki kovanda bango moko mpo na Bokonzi ya Nzambe bazali kosala yango mpo na kosalela Nzambe mobimba. “Bakufi”

awa elingi koloba bato oyo, na ndenge ekeseni, baponaki bomoi ya kovanda bango moko mpo na koluka liboso Bokonzi ya Nzambe (Matayo 6:33).

Esukiseli: Kondima kobengama na yo moko

Kobengama ya Nzambe mpo na moto na moto ezali ya kokesana mpe ya ntina. Ndenge Yoane Mobatizi azalaki na kobengama na ye, mpe Yesu Ye moko azalaki na kobengama ya kolobikisa mokili, biso mpe tozali na kobengama na biso. Likambo ya ntina ezali te kokokanisa bomoi na biso na ya basusu, kasi kondima esika Nzambe atiaki biso mpe kosalela Ye na bosembo.

Bokanisa maloba ya Polo na 1 Bakorinto 12:12-14, epai azali kokokanisa nzoto ya Klisto na nzoto ya moto: eteni nyonso ezali na ntina mpe na mosala na yango. Ezala ozali moto ya bonsomi to ozali na se ya bokonzi, obali to obalani te, kobengama na yo ezali ya motuya mpo na kotonga Bokonzi ya Nzambe.

Nzambe apambola yo.

Share on:
WhatsApp